



Republika e Kosovës
Republika Kosova
Republic of Kosovo



Komuna e Kaçanikut
Opština Kačanik
Municipal Kačanik

01Nr. 60/01-27687/22
Kaçanik, 20.10.2022

PROCESVERBAL

Nga mbledhja e **IX (nëntë)** e Rregullt e Komitetit për Politikë dhe Financa (Legjislatura e VII e Kuvendit të Komunës), mbajtur me 20 tetor 2022. Mbledhja u mbajt në katin e dytë të objektit të administratës komunale, në sallën e komiteteve, me fillim pune në ora 11:00.

Pjesëmarrës në mbledhje nga Komiteti për Politikë dhe Financa- KPF ishin 6 anëtarë: Kemal Murseli, Kadri Krivenjeva, Fitore Vishi, Kadrije Lika-Troni, Ardita Rrahmani, Rabije Sallahi. Në mbledhje mungoj me arsye Agim Mani.

Nga Ekzekutivi i Komunës në mbledhje morën pjesë: Kryetari i Komunës- Besim Ilazi, drejtorët e drejtorive: Bahri Selimi-DBF, Zahir Doda-DA, ndërkaq nga zyrtarët: Vedat Dema- Koordinator i ZDNJ dhe Mavije Murseli- asistente e Kryesuesit të KK.

Mbledhjen e monitoroj nga OSBE- Faruk Dërmaku.

Mbledhjen e kryesoj, Kemal Murseli, Kryesues i Kuvendit.

Procesmbajtës: Makfire Malsiu, Zyrtare për punë të KK.

Fillimisht Kryesuesi i Kuvendit, Kemal Murseli, i përshëndeti pjesëmarrësit e kësaj mbledhje, konstaton kuorumin, me arsye mungon Agim Mani, -me ka njoftuar se është jashtë shtetit. Kushte pune me u mbajtur mbledhja ka, andaj e hapi mbledhjen e IX (nëntë) të rregullt të KPF-a për vitin 2022, data me këtë:

REND PUNE

1. Aprovimi i Procesverbalit nga mbledhja e kaluar e KPF;
2. Raporti financiar për periudhën: Janar-Shtator 2022;
3. Propozim Vendimi për caktimin e normave tatimore për tatimin në pronën e paluajtshme për vitin 2023;
4. Plani i Veprimit për parandalimin e dhunës në familje, 2023-2025;
5. Informatë për fillimin e Vitit të Ri shkollor 2022/2023;
6. Informatë për përfundimin e Vitit shkollor 2021/2022;
7. Propozim Vendimi për realizimin e një vizite studimore e Kuvendit të Komunës Kaçanik në Republikën e Shqipërisë;
8. Propozim Vendimi për transfer të mjeteve sipas buxhetit të vitit 2022;
9. Propozim Vendimi për transferim dhe rialokim të mjeteve buxhetore.

Para se me hapur diskutimin, Kryesuesi i Kuvendit kërkoj nga KPF që në rend pune të hynë edhe pika 9, duke i dhënë arsyet se ka lindur nevoja e rialokimit dhe transferit të mjeteve për shpenzim sa me të madh të buxhetit. Kjo çështje e vonuar për KPF, për KK nuk është e vonë me dërguar këtë material. Lidhur me rendin e punës e hapi diskutimin:

znj. Ardita Rrahmani: Për këtë herë pajtohem edhe pse nuk ka kuptim me marrë kaq vonë këtë material, ndërkaq për hera tjera me na ardhur materiali i veçantë për KPF dhe i veçantë për mbledhje të KK.

Kryesuesi i Kuvendit: E potencova se kjo është çështje e vonuar, por duke pa rëndësinë e buxhetit, nevojës për shpenzim sa më të madh të buxhetit, është pa e nevojshme me proceduar edhe këtë pikë. Rendin e punës e shtroj në votim dhe i njëjti u aprovua njëzëri. Në saje të kësaj del konstatimi së KPF e

APROVON

Rendin e punës në përbërje prej 9 pikëve.

U kalua në shqyrtimin e pikave sipas renditjes:

1. Aprovimi i Procesverbalit nga mbledhja e kaluar e KPF;

Kryesuesi i Kuvendit: Vërejtje në procesverbal nuk pati, atëherë Procesverbalin e mbledhjes së kaluar të KPF e shtroj në votim për aprovim dhe i njëjti u aprovua njëzëri. Në saje të kësaj del konstatimi së KPF e,

APROVON

Procesverbalin e mbledhjes së VIII (tetë) të rregullt e Komitetit për Politikë dhe Financa (KPF) të datës 26.09.2022/ Lënda: 01Nr. 60/01-25444/22.

2. Raporti financiar për periudhën: Janar-Shtator 2022;

Kryesuesi i Kuvendit: Raportet financiare trajtohen në KPF dhe KK në çdo tre muaj. Edhe pse janë trajtuar në vitin 2021, MAPL në Grantin e performancës na kishte vlerësuar me 0 pikë këtë indikator. Është mirë me shprehur këtë shqetësim në MAPL pasi kishte ende afat të ankesave.

Kryetari i Komunës-Besim Ilazi: Raportet financiare janë trajtuar, por çështja është së Raporti tremujor financiar janar-mars 2021 nuk është trajtuar në muajin prill, por në muajin maj. Kjo është arsyeja që nuk e vlerësojnë me pikë në Grantin e performancës.

Kryesuesi i Kuvendit: Fjalën e ka drejtori i DBF, Bahri Selimi:

z. Bahri Selimi: Në raportin financiar pasqyrohet buxheti i aprovuar dhe buxheti aktual. Buxheti aktual është 9,959, 638.88€ Buxheti i shpenzuar në total është 5,081,600.27€ apo 59%. Në raport me vitin e kaluar, është për 6.21 % me pak i shpenzuar të Granti i Arsimit dhe të Granti i Shëndetësisë. Të HVK janë 7.50%, ka munguar inkasimi në muajin shtator që ishte grevë për 18,000 € me pak. Sipas kategorive ekonomike janë shpenzuar, Paga; 66%, Mallra dhe shërbime 57%, Shërbime komunale 33%, Subvencione dhe transfere, 51%, Investime kapitale 25%, ku mjetet janë shpenzuar kryesisht nga granti qeveritar, ndërkaq me pak të shpenzuara janë mjetet nga të HVK. Shpenzuesi me i madh është drejtoria e Arsimit me 53%, Shëndetësia dhe Shërbimet Sociale 14%, 33% të gjitha shërbimet tjera të administratës. Të Mallrat dhe Shërbimet në mënyrë analitike e tregojmë secili mjet ku është shpenzuar, nuk ka shpenzime pa vend, p.sh. dreka zyrtare

583€. Shpenzimet e gjykatave për vonesa na janë shqiptuar disa gjoba. Janë të specifikuar shpenzimet e Subvencioneve dhe Transfereve, shuma 172,646.46€. Drejtori dha edhe shpjegime tjera sesi është shpenzuar buxheti, në secilin sektor, ndërkaq shtoj se lufta në Ukrainë ka ndikuar në inflacion- ngritjen e çmimeve. Kompanitë edhe pse i kanë nënshkruar kontratat, kërkojnë me ua ndryshuar çmimet për shkak të inflacionit.

Kryesuesi i Kuvendit: A ka kush që donë me marrë fjalën:

znj. Kadrije Lika-Troni: Pyetje për drejtorin: Të shpenzimet kapitale, përqindja e realizuar 24% është shumë e vogël në këtë kategori buxhetore. Cila është arsyeja që nuk janë shpenzuar me tepër mjete?

z. Bahri Selimi: Shikuar historikisht projektet, lidhen kontratat, anulohen, çështja e vonimit të pagesave, krejt këto shkojnë në dëme të operatorit ekonomik. Herëve tjera, realizimi ka qenë me i lartë, tani pagesat janë këto që janë, ka pasur ngecje të organi shqyrtues i prokurimit publik. Sipas ligjit, ofertuesi me i lirë e merr kontratën, ndërkaq është e drejta e ankesës për ofertuesit me çmime me të larta. Ne si komunë pësojmë sepse ka procedura shqyrtimi i ankesave dhe merr kohë. Tani deri me këtë datë 20 shtator është ngritur përqindja e realizimit të projekteve. Më shumë informata mund të japin drejtorët e DUKMM dhe DSHPE, mirëpo të njëjtit janë në terren. Nëse iu intereson ndonjë projekt i specifikuar, mund të jap sqarime, ndërkaq në përgjithësi të dhënat i dinë me mirë dy drejtorët, se janë me kompetentë. Lufta në Ukrainë, inflacioni, ngritja e çmimeve, firmat i kanë kontestuar çmimet dhe kanë kërkuar me ua ngritur pagesat, por Zyra e prokurimit nuk ka të drejtë me i lëvizur çmimet, ndërkaq operatorët nuk kanë faj se çmimet janë ngritur. Pritet miratimi i një rregulloreje e qeverisë lidhur me këtë çështje.

Kryesuesi i Kuvendit: Rregulloren e ka hartuar qeveria, pritet miratimi në KK. Kuvendi i Kosovës e miraton Bordin e OSHP, se ka pasur mungesë të anëtarëve të bordit deri vonë.

znj. Kadrije Lika-Troni: Kush bënë pjesë në organin shqyrtues të OSHP ?

Kryesuesi i Kuvendit: Kuvendi i Kosovës e miraton Bordin e OSHP. Ka pasur mungesë të bordit të OSHP për shkak se bordi nuk ka qenë i kompletuar me funksionuar, ndërkaq tani para 1 muaji është formuar bordi i OSHP.

Kryetari i Komunës-Besim Ilazi: Po mundohem me dhënë sqarime konkrete znj. Kadrije. Për momentin e kemi tenderuar rrugën: Teneq-Stagovë, me çmim me të lirë, është ankuar operatori i dytë. Ankesa i shkon zyrës së prokurimit në afatin 10 ditor. Zyra e prokurimit ia kthen përgjigjen në bazë të dhënave që i ka, ndërkaq operatori ka të drejtë me u ankuar në OSHP. Në OSHP është eksperti që e vlerëson, ai e ka dhënë mendimin brenda 6 javësh, mirëpo duhet me dhënë mendim edhe bordi i OSHP. Bordi i ka dy mënyra: e thërret shefin e prokurimit me argumentuar, ose e kthen në favor të mendimit të ekspertit, se 90% e rasteve kthehen në mendimin e ekspertit, por për shkak se nuk ka funksionuar ka kohë bordi i OSHP, ata thonë se kemi shumë lëndë, edhe pse kontrata është në favor tonë, kemi mbetur peng që 8 javë, se pa e marrë përgjigjen nuk mund të lidhet kontrata. Kështu janë bërë 3 muaj e nuk kemi pasur mundësi me lidhur kontratë, kjo po ndodhë tek të gjithë. Në vitin e kaluar për shkak të mosfunksionimit të OSHP janë kthyer shumë mjete nga të gjitha organizatat buxhetore. Sivjet është duke funksionuar bordi, por me kapacitete të kufizuara.

znj. Ardita Rrahmani: Për derisa nuk i kemi prezentë drejtorët kompetent me folur për projekte, do të ishte me mirë me debatuar në KK këtë çështje me prezencë të drejtorëve të drejtorive përkatëse.

Kryesuesi i Kuvendit: Për çështjen e projekteve, është kryetari prezentë dhe mund të jap sqarime të nevojshme për projekte konkrete.

znj. Ardita Rrahmani: Të Projektet e zhvillimit të turizmit, janë paraparë 35.000 €, ndoshta është filluar ndonjë projekt, por nuk ka të dhëna të mjeteve të shpenzuara në këtë sektor.

Kryetari i Komunës: Ne kemi qenë të zëvendësministri i infrastrukturës me drejtorin Ramadush, në muajin qershor. Është pritur miratimi i rregullores me iu dhënë mundësinë kompanive me ua shtuar mjetet se janë ngritur çmimet. Ne e kemi rastin e Çarshisë së Vjetër, janë grant diku 140.000 €, vitin e kaluar është nënshkruar kontrata, ligji ia mundëson kompanisë mos me filluar punën se janë ngritur çmimet, sepse kompania shkon në humbje. Unë nuk po mundem me bindur kompaninë me filluar me punuar pa u miratuar rregullorja e OSHP dhe nuk kemi mekanizëm me detyruar kompaninë me punuar. Ky problem është nivel vendi, shpresoj të tejkalojmë. Kryesuesi tha se u miratua rregullorja në qeveri, pritet të miratohet në KK, dhe besoj se do të merr miratimin, në të kundërtën ne nuk mund të tejkalojmë këtë problem që ka ndodhur si rezultat i ndryshimit të çmimeve të tregut-inflacionit.

Kryesuesi i Kuvendit: Diskutime tjera nuk ka, atëherë a jeni që ky raport financiar t'i shkoj KK. Njëzëri u pajtuan të gjithë. Në sajë të kësaj del konstatimi se KPF,

Diskutoj

Raporti Financiar për periudhën: Janar-Shtator 2022 dhe i njëjti i procedohet Kuvendit të Komunës për diskutim.

3. Propozim Vendimi caktimin e normave tatimore për tatimin në pronën e paluajtshme për vitin 2023;

Kryesuesi i Kuvendit: Materialin e keni marrë, e keni parë se normat tatimore janë të njëjta me ato të vitit të kaluar, nën këto norma nuk mundemi me shkuar se ky është limit i fundit. E hapi diskutimin: Për diskutim nuk u paraqit kush, atëherë këtë pikë e shtroj në votim për aprovim dhe e njëjta u aprovua njëzëri me ia adresuar KK. Në sajë të kësaj del konstatimi së KPF e,

Aprovoj

Propozim Vendimin për caktimin e normave tatimore për tatimin në pronën e paluajtshme për vitin 2023. Ky propozim Vendim i,

Rekomandohet

Kuvendit të Komunës për shqyrtim dhe aprovim.

4. Plani i Veprimit për parandalimin e dhunës në familje, 2023-2025;

Kryesuesi i Kuvendit: Materialin e keni marrë, zyrtari që e ka hartuar planin e veprimit është këtu. E hapi diskutimin:

znj. Kadrije Lika-Troni: Unë e kam ngritur këtë temë në seanca të KK dhe të kryetari, me formuar një kod buxhetor për një punësim të një femre në Zyrën për Barazi Gjinore (ZBGJ). Dhuna në familje është me e theksuar të gjinia femërore dhe kjo zyre funksionon më mirë në terren kur ka përfaqësim femra, sepse rastet me lehtë i komunikohen një zyrtari femër. Unë në vazhdimësi

do të ngriti këtë çështje, pavarësisht se ju ndoshta mendoni se nuk janë krijuar ende kushtet edhe për një punësim në këtë zyre, mendoj se është nevojshme me qenë një femër në këtë zyre.

Kryetari i Komunës: Kjo është një rregullore që jemi të obliguar me pasur në nivel vendi. Sa për trajtimin e tyre është QPS dhe është një femër aty e punësuar. Për shkak të numrit të kufizuar, se kemi rate si të auditimi, duhet me i pasur 3 zyrtarë, por komunat e vogla e kanë problem me ngritur numrin e punëtorëve, jemi detyruar punëtorëve me iu dhënë edhe punë shtesë me i mbuluar pozitën e paplotësuar. Ne me shikuar me rregulla, në arsim janë 80 punëtorë me tepër, kështu për kohën e kemi problem me marrë edhe një punëtorë në atë zyrë.

znj. Kadrije Lika-Troni: Mendoj se edhe në zhvillim të aktiviteteve që parashihen, qasja e një femre, sidomos në zonat rurale, shumë me lirshëm kishin me u shprehur femrat për problemet e tyre, sesa që kishin me ardhur vet me raportuar rastet. E dyta, e kam potencuar çështjen e një strehimore për gratë dhe fëmijët që përjetojnë dhunë, së është vështirë dhe larg me u trajtuar në Ferizaj, ku përveç dhunës që përjetojnë, po duhet ndryshuar komplet edhe shoqërinë dhe kjo ndikon shumë edhe në psikikën e tyre.

Kryesuesi i Kuvendit: Organi që i trajton këto raste, do të ishte niveli qendror, se këto vende nuk mund të jenë edhe shumë publike për shkak të natyrës dhe problematikës që trajtohet. U përmend me qenë një femër në ZBGJ se funksionon më mirë kjo zyre. Ne duhet pasur parasysh faktin se kjo zyre zhvillon politika, bënë plane për trajtimin e barazisë gjinore, ndërsa Qendra për Punë Sociale (QPS) dhe Policia e Kosovës, merren ekskluzivisht me rastet. Kur flasim me barazinë gjinore, ne e marrin gjithnjë në kontestin e femrave barazinë gjinore, nuk është ashtu, se në shumë raste diskriminimi gjinor bëhet edhe të burrat. Është bërë mjaft në këtë drejtim, se ne kemi dalë nga një sistem patriarkal, por ende ka nevojë për emancipim e shkollim të gjinisë femërore. Ne po mundohemi përmes kësaj rregulloreje të ecim tutje, këto plane të veprimit të realizohen e mos të mbeten vetëm të shkruara në letër.

z. Vedat Dema- ZBGJ: Në komunën tonë, kur është bërë themelimi i njërive për të drejtat e njeriut, në kuadër të kësaj janë zyrtarët: zyrtari për të drejtat e njeriut, zyrtari për komunitet dhe kthim dhe zyrtari për të drejtat e fëmijëve. Në zyrën për barazi gjinore ka edhe komuna tjera që ka zyrtarë të gjinisë mashkull. Ne si zyrë kemi mbajtur aktivitete në bazë të planit të veprimit. dhe nuk besoj se është ndonjë specifikë që zyra për barazi gjinore me qenë me të punësuar me vetëm femra apo meshkuj, se barazia gjinore ka të bëjë me mbrojtjen e dy gjinive, burrave dhe grave. Sa i përket këtij plani, na obligon Strategjia Kombëtare e Dhunës në Familje, Konventa e Stambollit, si dhe infrastruktura ligjore e Kosovës. Me iniciativën e OSBE është bërë krijimi i mekanizmit 2021 ku ka qenë prezent edhe kryetari i komunës. Me kalimin e kohës, ne jemi të obliguar që ky mekanizëm të vepron. Duke pas parasysh Strategjinë Kombëtare, e kemi bërë këtë plan veprimi duke ia përshtatur specifikave të komunës tonë se bashku me akterët e mekanizmit, ku janë të përfshirë; policia, QPS -zyrtari që merret me rastet e dhunës në familje, arsimi, shëndetësia, e kemi hartuar një plan të kapshëm për me mundur me realizuar. Planit është 3 vjeçar, ka kosto buxhetore ku përfshihen aktivitetet, është përkrahja e strehimores "MY Home" në Ferizaj dhe ne si komunë jemi të obliguar me i dërguar atje me i strehuar. Kjo strehimore e ka për obligim me i strehuar, mirëmbajtur, ushqim etj. se e kemi një marrëveshje që kryetari e ka lidhur me strehimoren, përfshirë edhe mjetet financiare. Në bazë të informatave që i kam, ka ndodhur që nuk i kanë pranuar rastet se nuk kemi dhënë mjete. Në vazhdim z. Vedat Dema i përmendi numrin e rasteve në strehimore sipas viteve.

znj. Ardita Rrahmani: Kam një pyetje për Vedatin: Ka kohë që jeni zyrtar për mbrojtjen e drejtave të njeriut, merreni edhe me dhunën në familje. Cilat kanë qenë rezultatet e punës tuaj

përpos 9 rasteve të cilat janë dërguar në shtëpinë "MY HOME" në Ferizaj, duke ditur se ka raste të dhunës në familje me shumë se 9 raste, se ky është numër i vogël. A ka ndonjë mekanizëm me praktik që me i nxitë njerëzit me i treguar raste, se mund të ndodhë që edhe nëse e mban ndonjë takim në zona të thella malore, nuk besoj se marrin pjesë dhe i lajmërojnë rastet.

z. Vedat Dema: Rastet e dhunës në familje, raportin që e kemi marrë nga policia në vitin 2019 janë 24. Në vitin 2020, 16 raste, 2021, 30 raste. Është e vërtetë se ka raste me tepër marrë parasysh rrethanat që jetojmë, faktori ekonomik social nuk e raporton rastin se nuk ka ku shkon. Për të ardhmen duhet shikuar çka mundemi me bërë që rastet e dhunës në familje me u lajmëruar.

Kryesuesi i Kuvendit: Po të ndërpres Vedat, çështja që nuk keni raportuar rastet nuk është faji i juaj. Ky është plan veprimi e jo raport pune. Në raportet e punës së ekzekutivit të komunës figuron aktiviteti i ZBGJ. Nëse i shohim statistikën, ne si Kaçanik mundemi me u krenuar se ka pak raste të dhunës në familje.

Kryetari i Komunës: Meqë po bëhet fjalë për planin e veprimit, duhet të fokusoheni që me shtuar apo me hequr diçka, ndonjë sugjerim apo vërejtje. Për temën që u ngrit, unë kisha thënë me një propozim të juaj në KK e kishim debatuar me gjatë këtë çështje.

znj. Kadrije Lika-Troni: Me herët Vedati e përmendi që ka pasur raste të dhunës që nuk janë trajtuar as në strehimoren "MY HOME" në Ferizaj, për shkak se nuk iu është bërë pagesa shtëpisë ku trajtohen. Çka ka ndodhur me raste të tilla, ku janë trajtuar ato raste?

z. Vedat Dema: Ne kemi pasur marrëveshje bashkëpunimi dhe komuna jonë është zotuar se ka me iu ndihmuar strehimores, është edhe zyrtari që merret me rastet e dhunës në familje. Nëse nuk ka pasur mundësi me u trajtuar në strehimoren "MY HOME" në Ferizaj, ka shkuar në ndonjë strehimore tjetër. Në plan të veprimit për 3 vjet janë paraparë 3.000€ për strehimoren "MY HOME" në Ferizaj.

znj. Ardita Rrahmani: Të çështja e fuqizimit të rolit të gruas në shoqëri, përmes promovimit dhe rritjes së numrit të femrave në pozicionet vendimmarrëse, ndarja e përvojave aktivitetet që i kanë parapara, mundohen me u realizuar edhe përmes grupit të grave asamblistë. Unë kam kërkuar me u formuar Grupi i Grave Asambleiste, por ky grup nuk është formuar ende. Do të ishte mirë dhe është e nevojshëm me u formuar në mbledhjen e KK ky grup i grave. Në mandatin e kaluar sa e di unë ka qenë i formuar grupi i grave, por mjetet nuk ka pasur të ndara për aktivitetet e këtij grupi.

z. Vedat Dema: Grupi i grave është formuar çdo herë pas zgjedhjeve të reja. Unë kam marrë sa herë iniciativë e kemi themeluar Grupin e grave, e kemi bërë Planin e veprimit. Aktivitetet e mia që i kam pasur për barazi gjinore i kemi bërë me grupin e grave, për arsye se ju jeni ato që përfaqësoni një komunitet dhe jam i gatshëm për bashkëpunim. Me vjen keq që në mandatin e kaluar nuk ka pasur bashkëpunim të mirëfillta edhe pse jam munduar, nuk kanë shprehur interesim dhe unë si zyrtar për barazi gjinore nuk jam i obliguar çdo herë t'iu ofroj bashkëpunim, nëse nuk jeni të interesuar. Ne në bashkëpunim edhe me juve, OSBE mundem me formuar Grupin e Grave Asambleiste (GGA) me bërë edhe planin e veprimit dhe aktivitetet që mundem me i realizuar. Fushata vetëdijesimi qoftë për fuqizimin e gruas në vendimmarrje, trashëgimi, kam mbajtur rregullisht për çështjen e barazisë gjinore, falë bashkëpunimit me drejtorin e arsimit. Nëse ka pasur aktivitete GGA është financuar nga zyra për barazi gjinore.

z. Bahri Selimi: Nuk mundet me pasur kod të veçantë për aktivitete të Grupit të grave. Mjetet për aktivitetet e këtij grupi janë të parapara të Zyra e KK.

Kryesuesi i Kuvendit: Grupin e Grave Asambleiste që dy mbledhje iu kam thënë me u ndalë e me formuar, por ju nuk keni qenë të gjitha të pajtimit me qëndruar pas mbledhjes. Në mbledhjen e KK, pas anëtarët asambleiste ndaleni dhe e formojmë këtë grup të grave. Sa i përket mjeteve për aktivitete, ju Arditë e dini sesi bëhet shpenzimi i parasë publike, se keni punuar në institucione. Grupi i grave duhet me pasur projekte, duhet me pasur mbulesë për mjetet që ndahen. Diskutime tjera nuk ka, e shtroj në votim për aprovim këtë pikë dhe e njëjta u aprovua njëzëri me ia kaluar KK. Në sajë të kësaj del konstatimi së KPF e,

Aprovoj

Planin e Veprimit për parandalimin e dhunës në familje, 2023-2025. Ky plan i veprimit, Rekomandohet Kuvendit të Komunës për shqyrtim dhe aprovim.

5. Informatë për fillimin e Vitit të Ri shkollor 2022/2023;

Kryesuesi i Kuvendit: Materialin e keni marrë, drejtori është prezentë, e hapi diskutimin:

znj. Ardita Rrahmani: Shprehi shqetësime për rënien e numrit të nxënësve në dy shkollat e mesme, ky fakt duhet të jetë shqetësim për të gjithë. Komuna duhet pasur ndonjë mekanizëm me i stimuluar nxënësit me vazhduar mësimin në shkollat e mesme.

Kryesuesi i Kuvendit: Është e vërtetë se numri i nxënësve të shkollave të mesme dita ditës është në rënie, se nxënësit po shkojnë në komuna tjera si, Ferizaj, Viti etj. për shkak të drejtimit dhe afërsisë. Nuk ka ligj që e specifikon apo ndalon striktë këtë çështje. Drejtori mund të na jep sqarime me të hollësishme për këtë çështje.

z. Zahir Doda: Informatat është në obligimin tonë me ia adresuar KK për informim, për shkak të peshës që ka arsimi, ndërkaq nuk votohen informatat, vetëm debatohet për to. Fillimi i vitit shkollor në tërë Kosovën dihet si ishte për shkak të grevës, uroj që kjo mos të ndodhë më. Informata është me të dhëna konkrete të pasqyruara, të dhënat janë të sakta, gjendja është kjo që është si në informatë.

znj. Kadrije Lika Troni: Për nxënësit të cilët e përsërisin vitin, ata mund edhe të bulëzohen. A keni planifikuar ndonjë trajtim të veçantë për ta ? Pavarësisht sesa kanë qenë problematik ata nxënës, duhet me bërë diçka në këtë drejtim, se në kohën e fundit fëmijët shumë po bulëzohen. Unë kam dëgjuar për bulëzim të nxënësve në mënyrën me të ulët, kështu a është planifikuar ndonjë trajtim i tyre nga ndonjë psikolog ?

z. Zahir Doda: Në kuadër të kësaj, unë kam arritur me plotësuar numrin e psikologëve 5 psikolog të punësuar në shkolla plus 1 psikolog është në proces që me i bërë 6 psikolog brenda sistemit tonë. Për 6 mijë nxënës, nga 1 mijë nxënës 1 psikolog, se kjo është shtylla kryesore që mundën me iu ndihmuar nxënësve dhe me zbutë këtë dukuri. I kemi 2 pedagog të punësuar në shkolla. Kjo dukuri është evidente në shkolla me çka e kam vërtetuar edhe vet fjalorin e tyre që përdorin etj., jemi munduar me iu ndihmuar në këtë çështje edhe me ligjërata të ndryshme në shkolla.

znj. Kadrije Lika-Troni: Të ndarja e bursave për nxënës të SHMP, kujtoj se është bërë diskriminim, sado që kjo ka qenë një politikë me i nxitur nxënësit me shkuar në atë shkollë, sepse ka rënë interesimi i nxënësve me u regjistruar në SHMP. Secili nxënës shkon në shkollë me nxënë dije. Nxënësit kur janë të njëjtës moshë me bërë dallime, kujtoj së është diskriminim me bërë ndarje të bursave vetëm në njërën shkollë. Unë kam pasur ankesa nga prindërit e nxënësve të

shkollës së mesme “Skënderbeu”, se janë diskriminuar në këtë drejtim nxënësit që janë në këtë shkollë.

z. Zahir Doda: Është menduar kjo, prindërit janë drejtuar edhe të unë, por nuk ka mundësi buxhetore.

Kryesuesi i Kuvendit: Ky hap është shumë i mirë që është bërë, se kjo ndodhë edhe në universitete. Shumë drejtime që kanë mungesë të studentëve, universiteti jep edhe bursa dhe ua mbulon shpenzimet tjera, vetëm me pasur studentë në drejtime të caktuara. Nuk është diskriminim, por stimulim me i nxitur nxënësit me u regjistruar në atë shkollë. Diskutime tjera nuk ka, e shtroj në votim për aprovim këtë pikë dhe e njëjta u aprovua njëzëri me ia kaluar KK. Në sajë të kësaj del konstatimi se KPF

Diskutoj

Informatë për fillimin e Vitit të Ri shkollor 2022/2023 dhe e njëjta i kalohet KK në procedurë për diskutim.

6. Informatë për përfundimin e Vitit shkollor 2021/2022;

Kryesuesi i Kuvendit: E hapi diskutimin:

znj. Kadrije Lika-Troni: A mos pak e vonuar kjo informatë, mos është dashur me ardhur në muajin korrik apo në muajin gusht ?

z. Zahir Doda: Jo, në planin e punës së KK thuhet, Informata për fillimin e vitit shkollor duhet me u debatuar në shtator, kurse atë të përfundimit shkollor në muajin tetor. Mua mi ka zënë dy informatat muaji tetor, pasi në shtator nuk filloj viti shkollor për shkak të grevës, përndryshe edhe mua me është dukur jo në rregull. Nëse e ndërroni me plan të punës së KK, për mua nuk prishë punë.

Kryesuesi i Kuvendit: Drejtor, ka arsye pse është Informata për fillimin e vitit shkollor me herët se ajo e përfundimit. Për fillimin e vitit shkollor i keni të dhënat dhe hartohet informata, ndërkaq për përfundimin e vitit shkollor, përpunohen të dhënat. Diskutime tjera nuk ka, e shtroj në votim për aprovim këtë pikë dhe e njëjta u aprovua njëzëri me ia kaluar KK. Në sajë të kësaj del konstatimi se KPF,

Diskutoj

Informatën për përfundimin e Vitit shkollor 2021/2022 dhe e njëjta i kalohet KK në procedurë për diskutim.

7. Propozim Vendimi për realizimin e një vizite studimore e Kuvendit të Komunës Kaçanik në Republikën e Shqipërisë;

Kryesuesi i Kuvendit: Propozimi ka ardhur nga unë. Vizita është e paraparë edhe në planin e punës së KK, gati se edhe në vitet tjera kemi realizuar vizita zyrtare dhe e kanë pasur efektin e vet. E kemi quajtur studimore, për faktin se ende nuk kemi ftesë për me quajtur zyrtare, sigurisht se ftesa do t’na vjen. E hapi diskutimin:

znj. Ardita Rrahmani: Është për t’u përshëndetur realizimin i kësaj vizite, ndërkaq nuk pajtohem të quajmë vizitë studimore, përveç së një lloj ekskursioni që do të realizohet në Shqipëri. Ajo që është për me u përshëndetur (e them me ironi) ne nuk po realizojmë vizita ndonjë vizitë zyrtare për me përfituar ndonjë ide etj., përpos një ekskursioni të cilën mundem me realizuar edhe privatisht. Pavarësisht kostos dhe atyre që marrin pjesë, nuk po paragjykoj, se unë këtë herë nuk mundem me marrë pjesë, do ishte mirë të takojmë dike nga përfaqësuesit e institucioneve si

asamblenë komunale dhe me arritur me krijuar raporte miqësore, pse jo edhe me na vizituar edhe komunën tonë, me lidhur raporte qoftë në aspektin kulturor apo në ndonjë fushë tjetër, të komunave si motra.

Kryesuesi i Kuvendit: Në këto vizita ka me pasur takime të nivelit bashkiak, por nuk i kemi siguruar ende se në cilat bashki do të realizohen. Vizita të tilla i kemi realizuar çdo herë. Këtë herë nuk i kam quajtur vizita zyrtare pa e ditur se cilat bashki kemi me i vizituar. I kam paraprakisht orientimet në 3 apo 4 vende, por ende nuk me është konfirmuar. Itinerarin kemi me caktuar me shefat e grupeve parlamentare. Vizitat e deritanishme nuk kanë qenë turistike edhe pse janë munduar me i quajtur turistike dhe ato vizita pos tjerash kanë ndikuar në përafrimin e anëtarëve të KK pozitë-opozitë. A nuk të duket shumë e rëndësishme që KK me vizituar Beratit, Gjirokastrën si qytete në mbrojtje të UNESCO e që vizitohen nga grupe politike e jo politike nga mbarë bota. Ka anëtarë të KK që nuk ka vizituar asnjëherë këto vende. Nuk ka keqpërdorim të parasë publike me këto vizita, vizita është në interes të KK me dalë e me pa, këto vizita kanë ndikuar në relaksim dhe krijimin e raporteve mes subjekteve politike.

znj. Ardita Rrahmani: Cilat kanë qenë rezultatet e vizitave të cilat i keni realizuar më herët, përveç raporteve kolegjiale, fjala vjen e keni vizituar bashkinë e Beratit, çka i ka sjellë ajo vizitë një anëtar të KK? Pse mos me marrë iniciativa që edhe ne me i ftuar për vizita zyrtare në komunën tonë ndonjë komunë, me shkëmbyer përvoja të ndryshme ?

Kryesuesi i Kuvendit: Në bashkinë e Beratit jemi pritur nga përfaqësuesit e institucioneve, kemi vizituar sallën ku mbajnë seancat, janë diskutuar çështje me interes në fushën trashëgimisë kulturore, kemi vizituar monumente historike kulturore. Secili anëtar që ka qenë i ka interesuar, ka pasur mundësi me përfutur shumë nga fusha e trashëgimisë kulturore. Ata kanë shumë burime të mëdha në fushën e trashëgimisë kulturore, diçka mundemi me marrë nga ata në këtë fushë, si të çështja e muzeut etj. Janë diskutuar edhe tema në fushën e bujqësisë, jemi njoftuar edhe me çështjen e kompensimeve të tyre, ku jemi njoftuar se ata e ndjekin një rrugë evropiane me punuar pa pagesë. Iniciativa ka pasur me i ftuar për Ditën e Çlirimit të Komunës ata të bashkisë së Elbasanit, nuk e realizuam për shkak të një rasti që patën ata të bashkisë. Shpenzimet buxhetore i bartë komuna jonë. Në këtë bashkinë e Beratit na kanë dhënë një drekë, ndërkaq sesa munden bashkitë me nda mjete për vizita të tilla me na vizituar ne, unë nuk e di, përndryshe vizita nuk kanë karakter ekskursioni. KK kanë nevojë për me shumë me dalë, me pasur trajnime, kemi qenë të interesuar me pasur trajnime këtu në Kaçanik, por iniciativa të tilla nuk po funksionojnë pa shkuar diku me larg. Diskutime tjera nuk ka, e shtroj në votim për aprovim këtë pikë dhe e njëjta u aprovua njëzëri me ia kaluar KK. Në saje të kësaj del konstatimi së KPF e,

Aprovoj

Propozim Vendimin për realizimin e një vizite studimore e Kuvendit të Komunës Kaçanik në Republikën e Shqipërisë. Ky propozim vendim i,

Rekomandohet

Kuvendit të Komunës për shqyrtim dhe aprovim.

8. Propozim Vendimi për transfer të mjeteve sipas buxhetit të vitit 2022;

Kryesuesi i Kuvendit: E hapi diskutimin: Për diskutim nuk u paraqit kush, atëherë e shtroj në votim për aprovim këtë pikë dhe e njëjta u aprovua njëzëri me ia kaluar KK. Në saje të kësaj del konstatimi së KPF e,

Aprovoj

Propozim Vendimin për transfer të mjeteve sipas buxhetit të vitit 2022. Ky propozim Vendim i,

Rekomandohet
Kuvendit të Komunës për shqyrtim dhe aprovim.

9. Propozim Vendimi për transferim dhe rialokim të mjeteve buxhetore;

Kryesuesi i Kuvendit: E hapi diskutimin: Për diskutim nuk u paraqit kush, atëherë e shtroj në votim për aprovim këtë pikë dhe e njëjta u aprovua njëzëri me ia kaluar KK. Në sajë të kësaj del konstatimi së KPF e,

Aprovoj
Propozim Vendimin për transferim dhe rialokim të mjeteve buxhetore. Ky propozim
Vendim i,

Rekomandohet
Kuvendit të Komunës për shqyrtim dhe aprovim.

Diçka tjetër për këtë takim nuk ka, kështu e konstatoj mbledhjen e përfunduar në ora: 12:12. Deri në fund të mbledhjes qëndruan të gjashtë anëtarët e KPF që ishin prezentë në këtë mbledhje. Mbledhja e Kuvendit do të mbahet me 26 Tetor 2022 në ora 11:00.

Procesmbajtës
Makfîre Malsiu

Malsiu



Kryesuesi i Kuvendit
Kemal Murseli

[Signature]